

Sistema Atensaun no Responde Sedu (AtReS) iha periodu Feveireiru-Marsu 2020 kontinua implementa servisu monitorizasaun ba insidente violénsia ne'ebé akontese. iha Munisipiu 4, Baukau, Dili, Lautein no Vikeké. Sistema ne'e parseria ho rede monitorizador iha baze atu halibur informasaun kona-ba insidente violénsia sira. Insidente ne'ebé rekolla ona regulármente haruka ba Koordinador Munisipiu sira hodi rejistu iha sistema baze dados nasional ho sistema online. Jestor baze de dados iha nasional uza dados ne'e hodi halo verifikasaun ikus no haruka ba Jestor programa sira hodi Analiza ba kauza sira ne'ebé hamosu insidente violénsia ne'ebé akontese. Ba maluk sira ne'ebé iha interese ba dados insidente violénsia ne'ebé akontese iha Timor-Leste, bele asesu iha www.atres.belun.tl

Revista situasaun periodu Feveireiru-Marsu 2020, kontinua iha Munisipiu Dili, Baukau, Lautein no Vikeké, aumenta tan nia kobertura ba Munisipiu 2 (Likisá no Covalima) hamutuk munisipiu 6, ho postu administrativu 18 (Baukau postu 5, Covalima postu 3, Dili postu 2, Lautein postu 2, Likisá postu 3 no Vikeké Postu 3. Parseiru monitorizador hamutuk na'in 16 (feto 5 no mane 11), monitorizador na'in ida ba kada postu administrativu. Dados insidente iha Munisipiu 6 periodu ne'e deskreve tuir mai ne'e:

ASUNTU NE'EBÉ PRESIZA TAU ATENSAUN

- ▶ **Violensia Doméstika hamutuk 40**
- ▶ **Violensia envolve Eis-memburu Grupu Arte Marsiál no Arte Rituál hamutuk 19**
- ▶ **Insidente violénsia tanba disputa rai no propriedade hamutuk 19**
- ▶ **Asediu –Violensia Seksuál hamutuk 5**

Total Insidente Munisipiu 6	
Munisipiu	Total Insidente
Baukau	55
Covalima	17
Dili	52
Lautein	3
Likisá	22
Vikeké	17
Total	166

INSIDENTE VIOLÉNSIA IHA BAUKAU, DILI, LAUTEIN NO VIKEKÉ, PERIODU FEVEREIRU - MARSU 2020

Belun ho nia Sistema AtReS iha periodu Feveireiru – Marsu 2020, ho apoiu husi kooperasaun Alemaña, GIZ kontinua rekolla dados iha Baukau, Dili, Lautein no Vikeké no kobre tan ba Covalima husi apoiu UNDP nia fundu kiik ba ambiente no Likisá husi apoiu fundu kiik Sekretariadu g7+. Insidente violénsia ne'ebé akontese iha periodu ne'e, hamutuk 166. Husi total ne'e, persentajen boot liu akontese iha Baukau ho 33%, tuir fali Dili ho 31%, Likisá 13%, Covalima no Vikeké ida-idak 10% no persentajen kiik liu akontese iha Lautein ho 2%. Haree husi sexu perpetrador, iha insidente 145 mak envolve mane, insidente 9 mak envolve feto 9. Insidente ne'ebé envolve autor feto no mane hamutuk 9 no deskoñesidu iha 3. Perpetrador nia estatutu sosial barak liu mak to'os ka natar ka animal na'in 47, membru família ne'ebé hela iha uma seluk 47, membru família ne'ebé hela iha uma hanesan 39, viziñu 32, membru grupu arte marsiál 2, dezempregu 18, estudante 15, ema deskoñesidu 9. Estatutu sosial sira seluk ne'ebé

nia numeru kiik liu mak Mestre/a ka Dosente 2, PNTL 1, Ofisiál governu 1, F-FDTL 1. Numeru aas liu husi estatutu sosial perpetrador nian mak seluk ne'ebé la inklui iha kategorizasaun no la hatene hamutuk 61 (Seluk 54, La hatene 7). Enkuantu vitima husi insidente ne'e, mane 99, feto 49, no vitima feto no mane hamutuk 16 no la hatene iha insidente 2.

Haree husi relasaun entre vitima ho perpetrador, iha tipu insidente tolu mak akontese iha periodu ida ne'e. Primeiru no barak liu mak insidente violensia entre individuál sira, hamutuk 100 (inklui violénsia doméstika kazu 40 no violénsia seksuál 5). Segundu, violénsia kolektiva komete husi grupu ida hasoru ema/grupu seluk ka grupu hasoru ema ida ka liu, iha insidente 60 (inklui iha laran violensia ne'ebé envolve eis-memburu grupu arte marsiál no arte rituál 19), no ikus mak violensia auto-dirigida 1.

Sasan ne'ebé uza iha insidente ne'e isin lolon (ez. liman, ain, nehan hodi tata, sst.) 96, istori malu, haksasuk malu, diskute malu, sst 70, ameasa liafuan ka fiziku 60, uza fatuk 30, ai dona, besi kanu, no seluk-seluk tan 17, rama ambon ka fisga 3, rakitan ka kilat manu 1, sasan seluk ne'ebé la inklui iha kategorizasaun iha 14.

Maneira ne'ebé uza hodi halo violensia barak liu mak agresaun fiziku hasoru ema (inklui baku/hana) iha 74, deskute malun iha 25, tuda (inklui tuda viatura, ema no uma) iha 19, ameasa iha 18, violensia verbál/psikolojiku iha 14, estraga propriedade iha 9, ataka/asalta iha 7. Kiik liu mak insidente violénsia ho maneira provoka malun, asediu seksuál, homisidiu, halo disturbiu iha festa fatin, faan labarik, naok, obriga estudante hemu koko tua husi rezultadu sira nia pratika tein tua, oho an, oho animál, no tentativa ba violasaun seksuál hamutuk iha insidente 14.

Kauza husi insidente ne'ebé akontese iha periodu ida ne'e, barak liu tutuir malun mak deskontamentu ba hahalok iha 35, odiu vingansa/problema pasadu iha 33, problema disputa rai ba uma/toos, rai eransa/baliza iha 19, deskonfia malun ba adulteiru iha 12, tanba lanu iha 9, dezentendimentu iha uma laran iha 8, kauza husi animál lakon no animá tama toos iha 7, orientasaun seksuál deksontroladu, poder no oportunidade iha 6, hadau malu rekursu sira hanesan bee, raihenek no ai horis iha 3. no kauza menor sira seluk, hamutuk iha 19 (rumores defamasaun/duun malu buan, dezentendimentu liga ba kultura, disputa liga ba efeitu husi dezastre naturál, faan labarik, hetan presaan husi familia, la simu grupu seluk nia ezistensia, viola akordu faan no sosa, abuzu poder). Kauza husi insidente sira seluk ne'ebé la hatene iha 15.

Impaktu husi insidente sira ne'e ema 2 mate (feto 1, mane 1), ema hetan kanek todan 9 (mane 8, feto 1), kanek kmaan 9 (mane 8, feto 1), ema halai husi fatin insidente 2, uma estraga 1, transporte estraga, sunu ka aat iha 3, animál mate iha 1. Husi insidente sira ne'e iha insidente 6 mak monitorizador ka koordinador munisipiu AtReS hanoin katak, insidente violénsia ne'e nia eskalasaun bele kontinua sa'e tanba problema la rezolve ho didi'ak, odiu vingansa sei eziste entre parte sira.

VIOLÉNSIA DOMÉSTIKA (VD) KONTINUA AKONSE IHA MUNISIPIU BAUKAU, COVALIMA, DILI, LIKISÁ NO VIKÉKÉ

Insidente violénsia kontinua akontese iha Munisipiu Baukau ho kazu 17, Dili kazu 7, Likisá iha insidente 8, Vikeké 6 no Covalima iha insidente 2. Husi total insidente 40 ne'e, insidente entre parseiru (feen ho laen) iha 25 enkuantu insidente 15 seluk entre membru familia ne'ebé hela iha uma hanesan. Asuntu oioin mak sai kauza ba insidente VD, aas liu mak tanba deskontamentu ba hahalok entre parte sira, tuir fali mak tanba deskonfia aduleiru no dezentendimentu oioin iha uma laran.

Ema ka entidades ne'ebé intervein iha insidente sira ne'e, mak PNTL intervein iha insidente 18 membru konsellu suku intervein iha insidente 15, membru familia husi perpetrador ka vitima iha insidente 14, viziñu intervein iha insidente 6, F-FDTL iha 4; Intervein husi ema seluk ka entidade seluk ne'ebé la inklui iha kategorizasaun ba opsau iha sistema, iha insidente 9. La iha ema ida mak intervein, iha insidente 13. Enkuantu iha insidente rua mak intervein husi lia na'in la'ós membru Konsellu Suku no ofisiál governu seluk.

INSIDENTE VIOLÉNSIA ENVOLVE EIS-MEMBRU GAM NO ARTE RITUÁL IHA DILI, COVALIMA, LIKISÁ, NO BAUKAU

Asaun violensia ne'ebé envolve eis-membru GAM no arte rituál iha Munisipiu Baukau, Covalima, Dili no Likisá hamutuk insidente 19 (Dili 9, Covalima 5, Likisá 3 no Baukau insidente 2). Kauza husi insidente hirak ne'e barak liu tanba odiu vingansa husi probema entre eis-grupu no kauza kiik sira seluk mak hanesan, deskontamentu ba hahalok, la simu grupu seluk nia ezistencia no lanu.

Tipu violensia ne'ebé halo husi perpetrador sira, barak liu mak agresaun fiziku (inklui ataka malun), tuir fali mak tuda (inklui tuda malun, tuda uma), provoka malun no estraga propriedade.

Impaktu husi insidente sira ne'e, mane kanek todan 4, kanek kmaan na'in 7 (feto 1, mane 6), ema halai husi fatin 4, uma 2 estraga (uma no fatin negosiu) uma privadu ida rahun, no estraga kareta 2. Iha insidente 2, mak tuir monitorizador no koordenador sira nia observasaun, iha possibilidade atu akontese fila fali iha tempu oin kuandu la-prevene sedu.

Deskrisaun insidente ne'ebé envolve eis-GAM tuir mai mak ida ne'ebé fó impaktu diretu ba ema no sasan:

- ▶ Dili: Postu Administrativu Cristo Rei, Iha suku Hera, aldeia mota kiik, loron 27-02-2020 tuku 11:00 dader, akontese, autor ne'ebé fila husi munisipiu, tanba la satisfaitu ho hahalok eis-grupu GAM seluk ne'ebé tuda sira iha dia 26-02-2020 kuandu sira husi Dili atu ba hakoi mate iha Vikeké, sira mos kuandu to fali iha fatin akontesementu, estraga ofisina ida no motor 2 ne'ebé hadi'ak iha ofisina, no tuda malu ho vitima ka autor sira iha area refere. Maske vitima nudar ofisina nain hakilar katak, labele estraga sasan no motor maibé sira la

rona. Insidenti ne hetan intervensaun husi PNTL no FFDTL no lori autor no vitima mai iha Polisia Munisipiu Dili. Konforme informasaun, autor nain 3 husik fali tanba menor idade maibé, sira seluk sei submete ba prosesu investigasaun tanba vitima hakarak autor sira selu nia sasan.

- ▶ Dili: Postu Administrativu Cristo Rei, suku Kuluhun aldeia Toko Baru, tuku 17:00, akontese eis-membru GAM ka autor ida liu husi joven ida nia uma oin, joven ne'e abuza no bolu autor 019, maibé wainhira autor husu katak, nusa mak bolu ha'u nune, joven ne'e hamriik basa joven ne'ebé ohin nia abuza. Joven ne'e la responde imediatu maibé, fila nonok ba uma, no lakleur nia fila mai ho nia maluk eis-membru GAM barak hodi asalta ida ne'ebé ohin basa nia. Maibé joven ida seluk mos nia maluk membru GAM sai mai hodi sira baku malu. Insidenti ne'e atua kedas husi PNTL no lori sira balun ba hatama iha sela Polisia, hodi tuir prosesu investigasaun.
- ▶ Covalima: Postu Administrativu Suai, suku Labarai, aldeia Nucbelis, iha loron 16 Feveiru 2020, mais ou menus tuku 11.00 dader, akontese asalta malu entre eis-membru GAM no ema ida kanek todan iha ulun, tamba odiu malu no balun lanu. Hafoin akontesimentu Polisia to'o kedas fatin hodi normaliza situasaun, no duni tuir perpetrador sira no koko atu tiru maibé lakonsege, no problema ne'e agora iha ona prosesu investigasaun.
- ▶ Likisá: Postu administrativu Likisá, Suku Dato, aldeia kamalehoru, Bairro Raegoa, loron 4 Marsu 2020, mais ou menus tuku 1 madrugada, akontese perpetrador ho nia grupo asalta uma comunidade nian. Tuir informasaun ne'ebé hetan, husi media iha loron 09 Marsu 2020 katak, nsidente ne'e laos foin akontese maibé ho ida ne'e ba daruak. Primeiru akontese iha dia 24 Janeiro 2020 mais umenus iha oras tuku 09 kalan, tuir mai iha loron 4 Marsu 2020 mais ou menus tuku 1 madrugada (Tuir vitima nia informasaun ba media Timor Post loron 7 Marsu 2020. Impaktu husi insidenti ne'e comunidade nia uma rahun, inklui sasan uma laran no Estatua Nain Feto ida. Vitima ho familia (feen ho oan na'in 3) halai sai hodi salva an. Autor sira hakotu hotu fiu eletrisidade no tuda lampu ampolas hafoin lori katana tetak janela no odamatan hodi tama ba uma laran. Hafoin grupo boot ne'e fila, vitima kontaktu kedas ba PNTL Munisipiu Likisá no too kedas iha fatin akontesementu hodi evakua vitima sira ba komando PNTL Likisá.
- ▶ Likisá: Postu Bazartete, Suku Ulmera, aldeia Terlau, Bairu Nasuta iha loron 17 Feveiru 2020, mais ou menus oras tuku 4:35 loraik, akontese grupu ida hare membru arte marsiál ida uza hela atributu grupu nian (kalung), grupu ne'e la simu hodi ataka grupu ne'e. Impaktu husi insidente ne'e, vitima ne'ebé hetan baku, monu ba rai naruk no hetan kanek kaman iha parte ulun ho liman. Kazu ne'e hetan intervensaun husi PNTL Munisipiu Likisá, no entrega ona ba Ministeriu Publiku.
- ▶ Baukau: Postu Laga, suku Tequinomata, aldeia Samaguia, iha loron 01 Feveiru 2020, mais ou menus tuku 14:00, akontese grupu eis-membru arte marsiál halo asaltu fiziku ba malu, tanba laran moras ka odiu vingansa entre sira. Insidente ne'e akontese wainhira grupu joven eis-membru arte marsiail ida hamutuk ho familia selebra hela sermonia kulturál, derepente grupu joven eis-membru arte marsiais seluk (perpetrador) ba halo asaltu fiziku hasoru grupu joven eis-membru arte marsiál ne'e ho nia familia (vitima). Kauza husi insidente ne'e, rezulta na'in 2 kanek grave no ida kanek kmaan. Perpetrador husi insidente ne'e, iha ona parte kompetente hodi prosesu tuir lei.

INSIDENTE VIOLÉNSIA TANBA DISPUTA RAI NO PROPRIEDADE HAMUTUK 19


Insidente violensia tanba disputa rai no propriedade iha periodu ne'e hamutuk 19 akontese iha Munisipiu 5, maioria akontese iha Baukau hamutuk 11, Likisá 3, Vikeké 2, Dili 2 no Covalima 1). Disputa rai ba to'os 14, rai eransa 1, rai ba uma 2, plantasaun iha toos 1 no rai/estrada publiku 1. Fatin akontesimentu iha toos 13, iha uma insidente 5 no iha estrada publiku insidente ida ne'ebé liga ba asesu ba estrada ne'ebé kauza husi dezastre natureza. Feto envolve iha disputa rai minimu kompara ho mane sira tantu hanesan perpetrador no mos vitima. Haree husi jéneru perpetrador (mane 17, feto 2), nune'e mos vitima (mane 17, feto 2). Husi insidente 19 ne'e 3 mak iha intervensaun PNTL, 4 la iha ema ida mak intervein enkuantu restu familia hamutuk ho membru konsellu suku mak ajuda intervein.

ASEDIU NO VIOLASAUN SEKSUÁL IHA MUNISIPIU BAUKAU NO COVALIMA


Asediu, no violasaun seksuál iha periodu ne'e iha insidente 5 ne'ebé akontese iha Munisipiu rua ne'e, akontese iha uma privadu no iha toos. Autor husi insidente sira ne'e mane ho idade varia (17, 20, 54 no 68). Estatutu sosiál husi autor sira mak, hanesan estudante, agrikultor no ema deskoñesidu.

Faktore ne'ebé kontribui ba violasaun sira ne'e dala barak tanba autor haree oportunidade no fôrsa ne'ebé nia iha hodi halo asaun hasoru vitima. Husi insidente 5 ne'e, kazu 1 deit mak hetan intervensaun husi membru familia autor no vitima, enkuantu insidente 4 seluk, la iha ema ida mak intervein.


GRAFIKU KARATERÍSTIKA JERÁL INSIDENTE IHA BAUKAU, COVALIMA, DILI, LIKISÁ, LAUTEIN NO VIKEKÉ




Sexu Perpetrador no Vitima




Kna'ar perpetrador Nian




Fatin Insidente




Fator Ne'ebé Kontribui ba Insidente




Sasan Ne'ebe Uza Iha Insidente



Impaktu Insidente



Emas ka Entidade Ne'ebe Responde



ATIVIDADE PROGRAMA – EVENTU DAME

- ▶ NGO Belun parseria ho GIZ, liu husi programa **Joven ba Mudansa**,
 - iha loron 11-14 Feveiru 2020, kontinua fasilita treinamentu iha Baukau, ba Joven na'in 17 (feto 9, mane 8) husi suku Buruma, Tirilolo, Caibada, Bahu, Buibau no Wailili, Munisipiu Baukau iha Baukau, ne'ebé tuir tiha ona treinamentu primeira faze iha loron 14-17 Janeiro 2020. Treinamentu ne'e hala'o durante loron haat mos, iha salaun kafeteria Adminitrasaun Munisipiu Baukau ho kolaborasaun autoridade Munisipál Baukau. Treinamentu ne'e enserra ho entrega sertiifikadu ho prezensa representante SEJD Munisipiu Baukau, Representante GIZ no Diretór Belun.



- Iha loron 25-28 Feveiru 2020, Belun realiza tan treinamentu segunda faze ba Joven na'in 11 (feto 6, mane 5) husi organizaun oi-oin no membru Konsellu Polísiamentu Komunitaria (KPK) husi Postu Administrativu Dom Aleixo no Cristo Rei, Foinsae Katolika (FOSKA) ne'ebé remata ona treinamentu primeira faze iha

fulan Janeiro 2020. Treinamentu ne'e enserra ho entrega sertiifikadu, ho prezensa GIZ, SEJD no Representante Diretór Belun.



- ▶ Parseria ho UNDP-CBA, NGO Belun iha loron 19 Marsu 2020, hamutuk ho autoridade Munisipiu Covalima realiza workshop ho tema” **Hasa'e Reziliensia Kapasidade Komunitade ho Adaptasaun ba Mudansa Klimatika**” hola fatin iha Salaun Adminitrasaun Munisipiu Covalima. Total Partisipante na'in 52 (mane 36, feto 16) kompostu husi, Administrador Munisipiu Covalima, Diretór Belun ho ekipa, Xefe Suku husi suku 14, Xefe Aldeia, delegada husi suku sira, Administrador Postu Administrativu Tilomar, Ofisiál Governu Lokál (OGL) husi Zumalai, Grupu feto husi Suai no Tilomar, ONG lokál, INGO no representante Diresaun Nasionál Prevensaun Konflito Kmunitária (DNPCK).



- ▶ NGO Belun Liu husi parseria ho GIZ ne'ebé implementa **Programa Ai ba Futuru**, iha Fulan Marsu 2020 realiza enkontru trimestral ho parseiru Rede Prevensaun no Responde Konflitu (RPRK) no mos representante grupu agrikultor sira iha Postu Administrativu Baguia, Laga no Quelicai Munisipiu Baukau, hodi hametin parseria no estratéjia ba prevensaun konflitu.

- Enkontru iha Postu Baguia realiza iha loron 11 fulan Marsu 2020, iha salaun enkontru postu administrativu Baguia, ho total partisipante hamutuk 43 (feto 4, mane 39) kompostu husi autoridade lokál, lideransa komunitária suku 10, inklui Administrador Postu, Komandante PNTL Esquadra Baguia, Xefe Suku, Xefe Aldeia, Delegadu no delegada, Representante Joven, Profesóres, no lider partidu polítiku balun.



- Enkontru iha Laga, realiza iha loraon 17 Marsu 2020, iha salaun enkontru postu administrativu Laga ho partisipante hamutuk na'in 20 (feto 2, mane 18) kompostu husi representante Administradór, Adjuntu Komandante PNTL Eskuadra Laga, Xefe Suku, Xefe Aldeia, Diretór Eskola, funsionáriu no lider partidu polítiku, Veteranu no funsionáriu husi Instituisaun Estadu.



- Enkontru iha Quelicai realiza iha loraon 18 Marsu 2020, iha salaun enkontru postu administrativu Quelicai, ho total partisipante hamutuk na'in 20 (feto 3, mane 17) kompostu husi Administradór postu, Adjuntu Komandante PNTL Eskuadra Quelicai, Xefe Suku, Xefe Aldeia, lider partidu polítiku, Veteranu no funsionáriu husi Instituisaun Estadu.



▶ NGO Belun parseria ho Sekretariadu g7+,

- Iha loraon 19 Feveireiru 2020, realiza enkontru iha suku Mota Ulun, postu administrativu Bazartete hodi sosializa kona-ba knaar no responsabilidade ba Rede referál hodi apoio vitima feto no labaraik husi violénsia bazeia ba jéneru no fahé informasaun kona-ba Lei violénsia bazeia ba jéneru ba comunidade. Enkontru ne'e partisipa ema 60 kompostu husi Care Int'l, MSSI, GFFTL, Edukasaun Munisipiu Likisá, Media no radio Komunitade Tokodede, membru konsellu suku no comunidade mota ulun.



- Iha loraon 17 Marsu 2020, apoia realiza enkontru regular rede Referál tulun vitima violensia bazeia ba jéneru iha Munisipiu Likisá, hola fatin iha salaun MSSI Likisá hodi fahé informasaun ba parseiru sira. Enkontru ne'e partisipa na'in 35 mai husi Organizaun ALFeLa, PNTL VPU, representante edukasaun Munisipiu, representante Sekretariadu g7+, Diretór Belun ho ekipa, Ministeriu Saúde Munisipiu Likisá, lider komunitaria (xefe suku), Komisaun Justisa e Paz, Care Int'l, DNPKK, MSSI no Media (Radio Tokodede).



KONA-BA REVISTA NE'E

Desde establesementu Sistema AtReS iha Belun iha tinan 2008 to'o 2016, sistema ne'e kobre Munisipiu hotu iha Postu Administrativu 43, maibé ho limitasaun finanseiru ne'ebé organizaun hasoru, iha 2017 sistema ne'e para provizoriu. Hahú reativa fali iha 2018 ho apoiu husi UN Women ho Programa Feto Pas no Seguransa ho area kobertura ba de'it iha Munisipiu 3 (Baukau, Covalima no RAEOA). Iha mediu 2019 (Maiu – Setembru) kobre tan ba Munisipiu Dili (iha postu administrativu 6) ho apoiu finanseiru husi DAP-DFAT. Iha tinan hanesan, ho apoiu Governu Alemaña, GIZ, sistema AtReS kontinua reativa fali iha Munisipiu 4, Dili, Baukau, Lautein no Vikeke (Posto Administrativu rua kada Munisipiu). Iha 2020 ho apoiu Sekretariadu g7+ reativa iha Munisipiu Likisá no ho apoiu UNDP reativa tan iha Munisipiu Covalima.

Revista situaun ne'e relata kona-ba asuntu xave relasiona ho insidente violénsia no tendensia husi dadus monitorizasaun liu husi Sistema Atensaun no Responde Sedu (AtReS) Timor-Leste durante Feveireiru-Marsu 2020 iha Munisipiu Baukau, Dili, Covalima, Lautein, Likisá no Vikeké. Atividade sira ne'e hetan apoiu finanseiru husi, GIZ, Sekretariadu g7+ no UNDP-CBA.

Informasaun kle'an liu iha www.atres.belun.tl

Atu hetan informasaun kléan liu tan kontaktu:

Luis da Costa Ximenes, Diretór, luis.belun@gmail.com

Romaldo Caetano, Jestór Dadus AtReS: romaldo.belun@gmail.com

Jesuína Maria do Rosário Abel, Jestor Programa, jesuina.belun@gmail.com